

Sarajevo, 14.02.2013.godine

**ČLANICAMA UPFBiH
Na pažnju DIREKTORA**

Poštovani,

Predsjednik PK Kantona Sarajevo gospodin Kemal Grebo, uputio je pismo kojim traži delegiranje predstavnika za osnivačku skupštinu Udruženja poslodavaca. Radi se o potpuno neprincipijelnom pokušaju podjele poslodavačkog sektora, a sve zbog ličnih ambicija i frustracija, koja na kraju može dovesti do gubljenja dostignutih pozicija poslodavaca u tripartitnom dijalogu.

Osoba koja se više od 20 godina nalazi na poziciji Predsjednika PK Kantona Sarajevo i čiji je neuspješan rad doveo do toga da se broj članova komore smanjio ispod 200, opravdanje za svoj neuspješan rad nalazi u uvijek u drugima. Jedini razlozi za poziciju u kojoj se nalazi komora su, prema njima, nepostojanje obaveznog članstva i djelovanje Udruženja poslodavaca FBiH. Koliko je to tačno procijenite sami. U istim takvim uslovima djelujemo i radimo i to nam nije smetalo da kvaliteom svog rada u našem članstvu iz Kantona Sarajevo imamo više od 2.500 poslodavaca znači 13 puta više nego PK Kantona Sarajevo.

To i ne čudi jer mi ne utužujemo svoje članstvo zbog neplaćanja članarine, nego djelimo sudbinu svog članstva. Mnogi nisu zadovoljni našim radom i godišnje imamo 20-30 izlazaka iz članstva, ali istovremeno učlanimo preko 100 novih članica. Tako da su danas u našem članstvu i giganti kao što su BH Telekom, ASA Holding, Elektroprivreda, Energoinvest, MIMS grupacija, preko kompanija kao što su Coca-cola, Bosnalijek, Centrotrans, Konzum, Ans Drive, Lutrija BH, Euroasfalt, Miprogradnja, BBI Real Estate, preko svih banaka, osiguravajućih društava, mikrokreditnih organizacija i društava za upravljanje fondovima, pa do malih kompanija kao što su Đikić doo, Infosoft, Strik konsalting i zanatskih radionica.

Kantonalno Udruženje poslodavaca Kantona Sarajevo član je Udruženja poslodavaca FBiH te preko njega i Asocijacije poslodavaca BiH. Kompanija plaćanjem jedne članarine, koja je uzgred budi rečeno 2-5 puta manja od članarine PK KS, ostvaruju pravo na svim nivoima organizovanja. To na žalost nije slučaj u komorskom sistemu jer plaćate jednu članarinu kantonalnoj komori, jednu federalnoj, a jednu VTK, što je protivno odluci o članarini u komorama.

Od 9 članova UO PK Kantona Sarajevo 8 su predstavnici kompanija koje su u našem članstvu. Sličan procenat zastupljenosti je i u drugim organima komore, pa se postavlja pitanje zašto bi neko bio u članstvu dva slična udruženja. Kako isti poslodavci iz komore mogu da mrze sami sebe jer su istovremeno i u Udruženju poslodavaca. Kako administracija komore i njen predsjednik, koji su izgleda jedini važni u cijeloj ovoj priči, bolje znaju interese poslodavaca od njih samih.

U pismu je iznijet veliki broj netačnosti i poluistina koje ćemo dole nabrojati i komentarisati.

- Već duži vremenski period organi Komore razmatraju mogućnosti pokretanja inicijative za formiranje novog udruženja poslodavaca Kantona Sarajevo koje bi, u skladu sa usvajanjem novog Zakona o radu, moglo učestvovati u postupku utvrđivanja reprezentativnosti i na taj način omogućiti da članovi Komore i drugi zainteresirani poslovni subjekti, putem svojih predstavnika direktno učestvuju u radu Ekonomsko-socijalnog vijeća Kantona Sarajevo.

Ovo nije tačno jer se radi o inicijativi Predsjednika lično a ne tijela komore, koja čak nije predviđena ni u planu rada za 2013. godinu. A drugo u Kantonu Sarajevo, više od 5 godina, izuzetno dobro radi ESV uz učešće 4 predstavnika UP od kojih su najmanje 3 istovremeno članovi PK KS.

Nakon toga uslijedilo bi, u saradnji sa drugim udruženjima, djelovanje i na federalnom nivou.

Netačno ovu aktivnost provodi samo Predsjednik PKKS i ni jedna druga komora. Čak šta više sa svim drugim komorama UP ima potpisan protokol o saradnji, koji su dostupni na našoj Web stranici osim sa PK KS.

- Udruženje poslodavaca, čije formiranje će biti podržano od Privredne komore Kantona Sarajevo, biće potpuno samostalno u smislu da će na osnivačkoj skupštini usvojiti svoja opšta akta, izabrati organe udruženja i predstavnike u ESV-u, te izvršiti registraciju u skladu sa Zakonom.
- Kompletnu logistiku za rad Udruženja obezbijediće Privredna komora Kantona Sarajevo, **TAKO DA ČLANOVI UDRUŽENJA NEĆE PLAĆATI POSEBNU ČLANARINU. Ovo bi kao trebala biti jeftina navlaka.**

Kako će neko biti samostalan a da mu drugi obezbjeđuje sredstva za rad. Sličan pokušaj je bio u PK RS koje je osnovalo svoje udruženje poslodavaca, koje nije priznato ni od jednog međunarodnog faktora, čak i kada su samo forme radi napravili dvojnu registraciju.

Sve ovo je protivno konvencijama ILO i na žalost neće imati nikakav efekat jer neće moći polučiti nikakve rezultate. Uostalom kako neko može odlučiti da ne namjenski, mimo finasijskog plana, troši pare koje su pare članstva a ne njegove.

RAZLOZI ZA OVU ODLUKU:

- Pojedina Udruženja poslodavaca su dosadašnjim djelovanjem nanijela veliku materijalnu i nematerijalnu štetu privrednim komorama u FBiH
- Od njihovog zalaganja za uvođenje dobrovoljnog članstva do stalnog negiranja uloge i značaja privrednih komora i stvaranjem odbojnosti;

- Prema privrednim komorama, zbog čega je došlo do osipanja dobrovoljnog članstva u (komorama) i time doveli u pitanje njihovo funkcionisanje;
- Udruženje poslodavaca se zalaže da se komore odvoje od vlasti i da im se ograniči finansiranje, čime se ograničavaju i onemogućavaju;
- Partnerski odnosi komora sa vlastima, a komore se svode na agencije, kakva praksa nije zabilježena nigdje u svijetu.

Potpuno netačno. Svugdje u svijetu Komore su komore a Udruženja poslodavaca su udruženja poslodavaca. Svi rade svoje poslove i sarađuju, jedino PK KS samo stvara tenzije i sukobe. Kako bi to bilo da Udruženje poslodavaca pristupi osnivanju nove Privredne komore. To bi bilo glupo zar ne. O kvalifikacijama i uvredama ne želim ni da govorim.

U tom kontekstu treba posmatrati i razloge skidanja novog Nacrta zakona o privrednim komorama u Federaciji BiH sa dnevnog reda redovne sjednice Predstavničkog doma Parlamenta Federacije BiH, održane 19.12.2012. godine, kojim je, između ostalog, predviđeno vraćanje obaveznog članstva u privrednim komorama. Time je još jednom nanesena šteta privrednim komorama u Federaciji BiH, a sve ovo što se dešavalo sa komorama od uvođenja dobrovoljnog članstva do danas na određeni način nanijelo je štetu i samoj privredi obzirom da su privredne komore bile onemogućene da u punom kapacitetu pružaju usluge svojim članovima (svim privrednim subjektima), pogotovo u nekim vremenskim razdobljima kada je vladala recesija u privredi i kada je privredi podrška komore bila najpotrebnija. To na najbolji način ilustruju podaci o sadašnjem stanju privrede koje objavljuju relevantne institucije u Kantonu Sarajevo, Federaciji BiH i BiH.

Uvijek je kriv neko drugi. Pa kako Udruženje poslodavaca može u takvim uslovima da opstaje i da se razvija a komora nemože.

Ovo su razlozi koji su natjerali privredne komore da pokrenu rješavanje ovog veoma ozbiljnog problema. Potreba da se uspostave drugačiji odnosi prema ovom problemu i u ovom domenu i inicijativa da se formiraju samostalna udruženja poslodavaca iz reda članova Komore i drugih zainteresiranih poslovnih subjekata i da se jasno razgraniče nadležnosti između komora i udruženja poslodavaca, dobila je punu podršku od velikog broja privrednika, imajući u vidu i činjenicu da sadašnje Udruženje poslodavaca KS ni izbliza ne predstavlja reprezentanta poslovnog sektora u KS u Ekonomsko-socijalnom vijeću Kantona Sarajevo.

Ponavljam od 4 predstavnika delegacije poslodavaca najmanje 3 su u članstvu i PK, a za četvrtog nismo sigurni. Imamo više od 13 puta brojnije članstvo nego PK KS i jedva čekamo da se utvrdi prava reprezentativnost. Pogledajte odredbe o reprezentativnosti u Prijedlogu ZOR-a kojim se utvrđuje reprezentativnost u procentu od 20% pravnih lica sa 20% zapsolenih.

Znači ne 20% pojedinaca.

Na ovaj način uspostavila bi se puna koordinacija i sinhronizacija aktivnosti privrednih asocijacija, kao što je Privredna komora i Udruženje poslodavaca, sa jasnom podjelom aktivnosti i jasnim nadležnostima, što bi se pozitivno odrazilo na podršku koju očekuju poslovni subjekti od svojih asocijacija. Komore bi ostvarivale partnerski odnos sa izvršnom i zakonodavnom vlašću u skladu sa nadležnostima regulisanim Zakonom o privrednim komorama u Federaciji BiH, posebno iz oblasti unapređenja privrede i poduzetništva, a udruženja poslodavaca bi, u skladu sa međunarodnim konvencijama i preporukama, ostvarivala tripartitni dijalog sa sindikatom i vladom, u oblasti

administracije rada odnosno unapređenju radnog zakonodavstva, o službama za zapošljavanje, politici zapošljavanja, razvoja ljudskih resursa i osnovnih ljudskih prava radnika, kao i uspostavljanje tripartitnog mehanizma u svrhu promovisanja implementacije međunarodnih standarda rada. Članovi privrednih komora bila bi pravna lica koja obavljaju privrednu djelatnost, a članovi udruženja poslodavaca bila bi fizička lica - vlasnici ili ovlašteni menadžeri tih pravnih lica odnosno privrednih društava, tako da bi i u tom smislu postojala jasna podjela članstva.

Ovo ne postoji nigdje u svijetu i ingeniozna je ideja Predsjednika PK KS.

Tako udružena privreda imaće daleko veći uticaj na izvršnu i zakonodavnu vlast, a komore će, uz ono što već sada imaju, još više ojačati i predstavljati vrlo kvalitetan servis za podršku razvoju privrede kao cjeline i tekućim privrednim aktivnostima svakog člana - privrednog društva.

KAKO BI SE NA VRIJEME PRIPREMILI I ORGANIZIRALI NAVEDENO UDRUŽENJE, MOLIMO VAS DA DELEGIRATE JEDNOG PREDSTAVNIKA ZA OSNIVAČKU SKUPŠTINU UDRUŽENJA POSLODAVACA.

U pripremi su i sva potrebna akta za osnivanje i djelovanje Udruženja. Rok za dostavu prijedloga je 12. februar 2013. godine.

Pozivamo naše članstvo da ne prihvati ovu štetnu inicijativu, jer niti će uspjeti da nanese veću štetu udruženju a sigurno neće pomoći PK KS, i da zatraži od Predsjednika PK KS da djeluje u skladu sa Zakonom i opštim aktima komore u interesu svog članstva a ne vlastitom interesu. Zamislite šta će se desiti ako od manje od 200 postojećih članica komore, zbog ovakve potpuno nepotrebne inicijative, iz njenog članstva 50 najvećih kompanija, o čemu imamo i konkretne najave.

Pozivamo naše članstvo da nastavi djelovati i u komori i u udruženju poslodavaca, i na taj način obezbjedi bolju zaštitu svojih interesa.

Srdačan pozdrav,

Mladen Pandurević
D i r e k t o r